

Li gamin a crèchu au fin fond do viladje
Dilé sès grands-parints, brâves, on p'tit còp taurdus ;
I vint todi on tims qu'i t' faut plèyî bagadje :
Là co bin qu'il a s' man, lès deûs vîs n'î sont pus.
Mins c'è-st-on vraî tchèstia, r'mètu à l' vîye maujone :
On bia laudje colidôr, one grande glace au mitan ;
I s' plante pa-d'avant l' murwè, tot sbaré, què lî done
L'îmaudje d'on raupinia sorîyant, bin ruv'nant.
Ci n'èst co qu'on djon.nia, mins c'èst d'abôrd on' ome !
Èt i n' sopwaterè nin qu'on djoûwe avou sès pîds.
I risquéye one chinéye, èt pa-d'avant li, c'èst come
S'i sèreut d' l'ôte costé : ti sorîs, i sorît.
« Dji m' dimande qué grimace qu'i freut s' dji m' mwaîjireûve ? »
I n' si sint pus, i flaye ! Là l' murwè tot spiyî.
Il aveut dins l'idéye qui l'ôte si disfindreûve,
Qu'i sèrin.n' fwârt au fwârt, c'èst l' couyon qu'a fritchî.
Sès deûs brès cotayîs, il a mau, i braît d' radje ;
Lès p'tits sclats d' vère à l' tête, c'èst tot ç' qu'il a moûdri.
Si man sorvint, sorît, rabrèsse èt rècoradje
Li roufion : c'èst s' raupin ! Èle sét bin qu'i souffrit.
« Djokez vos èt choûtez m' ! Quî ç' qui ç'a stî, l' warache
Qui s'a pinsé l' pus fwârt, qui v'leûve awè raîson ?
Mostrer qu'i p'leut yèsse maîsse, minme si c'è-st-à còps d' bwaches ?
Ci qu'a rèchu foû d' ça ? Dès spiyûres èt do song !
Vinoz véci, m' gamin, èt fians-è l'èspéryince :
On murwè ? Qué plaîji ! Sorîyo, i sorît ;
Tot lî stindant vosse mwin, rapaujîz vosse consyince :
D'on lan, sins rèflèchi, i vos l' sère sins l' lachî.
Lès djins sont-st-insi faîts, prustis avou l' minme pause :
Vos fioz bin avou l's-ôtes, on fait bin avou vos ;
Si vos cachîz misère, ou n' v'lu mète qui d's-èplausses,
I vèrè on momint qu' tot r'tchaîrè su vosse dos ! »

Albert Delvaux
Avri 2014.

Fritchî : déguerpir
Ni mète qui d's-èplausses : faire semblant d'aider